

REGLUR UM FRÍSTUNDASTYRKI Sveitarfélagsins Árborgar

1. gr.

Markmið og tilgangur

Sveitarfélagið Árborg veitir foreldrum/forráðamönnum barna á aldrinum 5-17 ára frístundastyrki vegna þátttöku í skipulögðu íþrótt- og tómstundastarfi, hér eftir nefnt „frístundastarf“.

Meginmarkmið frístundastyrksins er að öll börn, 5-17 ára, í Árborg, geti tekið þátt í uppbyggilegu frístundastarfi óháð efnahag eða félagslegum aðstæðum. Meginskilyrði styrkjanna er að starfsemin sé á forsendum uppeldislegra gilda og forvarna.

Vísað er til 1. greinar æskulýðslaga nr. 70 frá 2007.

„Með æskulýðsstarfi er átt við skipulagða félags- og tómstundastarfsemi þar sem börn og ungmenni starfa saman í frístundum sínum að hugsjónum, markmiðum og áhugamálum sem þau sjálf meta að verðleikum. Í skipulögðu æskulýðsstarfi skal hafa í huga félags-, forvarna-, uppeldis- og menntunarleg gildi þess sem miðar að því að auka mannkosti og lýðræðisvitund þátttakenda.“

Vísað er til 2. greinar íþróttalaga nr. 64 frá 1998.

„Meginmarkmið aðgerða ríkis og sveitarfélaga á sviði íþróttamála skal vera að stuðla að því að allir landsmenn eigi þess kost að iðka íþróttir við sem hagstæðust skilyrði. Samstarf ríkis og sveitarfélaga við hina frjálsu íþróttahreyfingu skal taka mið af gildi íþróttaiðkunar fyrir uppeldis- og forvarnastarf“.

2. gr.

Almennt um frístundastyrk og úthlutunarreglur

Frístundastyrknum er úthlutað til barna í formi styrks frá Sveitarfélaginu Árborg sem foreldri/forráðamenn ráðstafa til þeirra aðila er standa fyrir skipulögðu frístundastarfi og falla undir styrkhæfisreglur sveitarfélagsins.

Með frístundastyrknum má greiða að fullu, eða hluta, fyrir íþrótt-, lista- og/eða aðra tómstundastarfsemi á vegum félaga og fyrirtækja sem falla undir áður nefndar styrkhæfisreglur. Foreldrar/forráðamenn barna geta ráðstafað frístundastyrknum hvenær sem er á árinu og óháð fjölda greina/námskeiða.

Styrkupp hæð er í samræmi við gildandi samþykkt bæjarstjórnar Árborgar hverju sinni. Styrkur getur aldrei orðið hærrí en æfinga-/námskeiðsgjald viðkomandi frístundatilboðs.

Ekki er heimilt að nýta frístundastyrkinn til að greiða sérstakan viðbótarkostnað svo sem vegna tækja og búnaðar, fatnaðar og ferða.

Ráðstöfun er endanleg. Ekki er hægt að endurgreiða eða bakfæra styrk þegar foreldri/forráðamaður hefur ráðstafað styrk til félags á grundvelli frístundastyrksins.

3. gr.

Skilyrði fyrir veitingu styrks

Að barnið eigi lögheimili í Sveitarfélaginu Árborg og sé á aldrinum 5-17 ára miðað við fæðingarár.

Iðkendur eiga rétt á styrk frá og með því ári sem 5 ára aldri er náð, til og með því ári sem 17 ára aldri er náð.

Börn sem flytja í Sveitarfélagið Árborg fá fullan styrk á því ári sem flutt er í bæjarfélagið.

4. gr.

Skipulagt frístundastarf og styrkhæfi aðila

Velferð og hagar barna skal hafður að leiðarljósi í frístundastarfi og í samræmi við ákvæði laga og reglugerða er varða börn. Skipulagt frístundastarf þarf að uppfylla eftirfarandi skilyrði til að teljast styrkhæft:

a. Að um sé að ræða skipulagt frístundastarf undir stjórn/leiðsögn menntaðs fagaðila á sviði íþrótt- og tómstunda. Börn undir 18 ára aldri skulu ekki starfa við þjálfun, kennslu- eða leiðbeinendastörf í barnastarfi ein síns liðs. Fagaðili getur þó haft einstaklinga undir 18 ára aldri sér til aðstoðar.

b. Skipulagt frístundastarf þarf að ná yfir 10 vikur samfellt hið minnsta. Ekki eru veittir styrkir vegna hefðbundinna sumarnámskeiða eða annarra námskeiða sem eru styttri en 10 vikur samfellt.

c. Starfsemi sem telst styrkhæf er starfsemi á vegum íþrótt- og tómstundafélaga, nám við tónlistarskóla og dansskóla. Skipulögð námskeið s.s. innan líkamsræktarstöðva, sjálfsstyrkingar og önnur þau námskeið sem uppfylla skilyrði reglna þessara falla undir styrkinn.

d. Starfsemi sem ekki telst styrkhæf er starfsemi trúfélaga önnur en kórastarf og annarra lífsskoðunarfélaga, stjórnmalasamtaka, viðvera eftir skóla og stök líkamsræktarkort.

e. Aðili sem sinnir skipulögðu frístundastarfi skal gera samning um frístundastyrk við Sveitarfélagið Árborg að uppfylltum reglum um styrkhæfi.

f. Aðild að frístundastyrknum má ekki verða til þess að gjaldskrár/æfingagjöld aðila hækki óeðlilega milli ára.

g. Starfsmenn frístunda- og menningarsviðs meta hvort einstakir aðilar uppfylli skilyrði reglna. Leiki vafi á styrkhæfi bera starfsmenn tillögur sínar undir íþrótt- og menningarnefnd Sveitarfélagsins Árborgar.

5. gr.

Samstarfssamningur

Aðilar sem uppfylla ofangreindar reglur um frístundastyrki geta sótt samstarfssamning á heimasíðu Árborgar, www.arborg.is. Starfsmenn frístunda- og menningarsviðs meta hverja umsókn og veita aðilum sem uppfylla skilyrði, aðgang að frístundastyrkjakerfinu. Í framhaldi er gerður samningur þar sem eftirfarandi upplýsingar skulu koma fram:

- a) Nafn, kennitala, símanúmer, netfang og heimasíða aðila. Að auki nafn, kennitala, símanúmer og netfang tengiliðs vegna umsóknar og/eða ábyrgðaraðila
- b) Tegund starfsemi og starfssvæði
- c) Tímatöflur og námskeiðsframboð
- d) Gjaldskrá
- e) Upplýsingar um aðstöðu/húsnæði

6.gr.

Uppgjör og skil aðila á gögnum

Frístunda- og menningarsvið fer með styrkuppgjör af hálfu Árborgar. Styrkuppgjör til aðila er í fyrstu viku hvers mánaðar og fer uppgjör fram með rafrænum hætti.

Aðilum að Frístundastyrknum ber að skrá alla þátttakendur á hverju tímabili í frístundastyrkjakerfið, hvort sem þeir nýta styrkinn hjá viðkomandi aðila eða ekki.

Brot á reglum og skilyrðum Frístundastyrksins geta leitt til samningsslita.

Reglur þessar verða endurskoðaðar eins oft og þurfa þykir.

Samþykkt í íþrótt- og menningarnefnd 9. ágúst 2016

Samþykkt í bæjarráði 17.ágúst 2016